

Senza examen a la scola media

Incumbensa parlamentara da deputà Remo Cavegn (PCD Razén)

■ (fmr/mc) Cun in'incumbensa parlamentara vulan deputà Remo Cavegn (PCD Razén) e 38 ulteriurs deputads incaricar la regenza da stgaffir la basa legala per in'admissiun senza examen a las scolas medias grischunas. En l'argumentaziun da sia incumbensa constatescha deputà Remo Cavegn ch'i saja da princip il pensum da la scola populara da stgaffir las premissas necessarias per frequentar ils stgalims da scola suandants. Essenzial saja natiralmain dentant era che las scolaras ed ils scolars sezs s'engaschian commensuradamain per cuntanscher quest access. En vista als examens d'admissiun per la scolas medias ch'han er lieu proximamein en il Grischun porschan differentas instituziuns e privats curs da preparaziun e forums d'emprender u models da fatschenta, per part gia a partir da la tschintgavla classa. Quels hajan dentant preni talas dimensiuns ch'els daventian magari determinants ed uschia inevitabels per il success d'examen, constatescha il schef da fracziun da la PCD. Quest svilup stettia en cuntradicziun cun l'intenziun che la scola populara ha il pensum da preparar scolaras e scolars per pudair frequentar la scola media. E quai independentamain da las pussaivladads finanziaias dals geniturs.

Egualitad da las schanzas

Sco quai ch'ils moziunaris punctueschan na po l'admissiun a la scola media betg esser la raschun per promover tals models da fatschenta. Considerond ils excessmenziunads stoppian ins sa dumandar



Tenor ina grupp dal Cussegl grond duessan ils examens per l'admissiun a las scolas medias – sco qua a l'Academia Engiadina a Sa-medan – vegnir stritgads.

FOTO SOMEDIA

cun raschun sch'i vegnian la finala recepids las «dretgas scolaras ed ils vairs scolars» en las scolas medias. Auters chantuns sco Lucerna, Zug, Uri e Basilea-Champagna renunzian numnadamain gia oz ad examens d'admissiun u prevedan mo tals sche la recumandaziun è dispitaivla. Ad ina tala procedura da qualificaziun per la cuntinuaziun sin il stgalim superiur sa participeschan per exempel automaticamain tut ils scolars davent da la tschintgavla classa. Ils magisters da classa orienteschan mingamai en l'emprim semester da la tschintgavla classa

davart la procedura, il medem fan era las scolas medias. La finala decidan dentant ils magisters da classa davart l'admissiun definitiva.

Considerond il svilup en il chantun Grischun ed era resguardond las experientschas positivas fatgas en ils chantuns numnads pari als incumbensaders oportun ch'er il chantun Grischun introduceschia in model senza examens. Sco quai che Cavegn punctuescha en quest connex na sa tracti betg d'auzar la quota da scolars da la scola media u da sbassar las premissas da prestaziun. La finamira

saja plitost da chattar in meglier sistem che garantescha l'egualitad da las schanzas. Quai saja la finala segiramain er in avantatg per las scolas medias privatas en las regiuns. Che las scolas medias privatas rinforzian indisputaivlamain era las regiuns e lur economia duessia esser enconuschent, remartga il moziunari.

El e ses 38 consignants incumbenschan la regenza da stgaffir la basa per in'admissiun senza examen a las scolas medias dal Grischun. Il Cussegl grond vegn probabel a discutir l'incumbensa en la sessiun d'avrigl.